




Australian Government

Wan Gaed long saed blong ol Rod Rul long Ostrelia

palmscheme.gov.au

Ol rod rul long Ostrelia oli defren long ol rul blong ol kantri blong Pasifik mo Timor-Leste. Bifo yu draevem trak o ka long Ostrelia, mekem sua se yu gat wan laesens blong draev we hem i no ekspae. Mo yu mas jekem sapos yu save draev long laesens blong yu long ples we yu stap draev long hem long Ostrelia.

OL TRAFIK LAET



Sistem blong ol trafik laet long Ostrelia i gat tri kala laet:

- kala **red** i minim se yu mas stop.
- kala **yelo** (we oli kolem amba) i minim se yu mas stop. Yu save pas tru long wan yelo laet sapos hem i no sef blong yu stop bifo long laen we oli makem blong yu mas stop. Yu no mas stop hariap, mo yu no mas draev spid blong pas tru long yelo laet.
- kala **grin** i minim se yu save pas tru long krosrod sapos hem i sef blong mekem.

OL RENTABAOT



- Ol rentabaot oli ol krosrod we i goraon mo ol trak o ka oli draev i goraon long wan daereksem nomo.
- Yu mas slodaon taem yu kasem wan rentabaot, mo yu mas wet long ol trak o ka we oli stap kam long raetsaed blong yu.

OL SPID LIMIT



- Hem i impoten blong folem gud ol notis blong spid limit.
- No draev long wan spid we i bitim namba we i stap long notis blong spid limit. Namba ia nao yu no save bitim taem yu draev.
- I gat wan spesel spid limit we hem i lo long eria blong ol skul long samfala taem blong dei we ol pikinini oli skul.
- Sapos yu draev long wan spid we i bitim spid limit we i stap i minim se yu stap brekem loa mo oli save mekem yu faen.

STRAP BLONG JEA



- Ol draeva blong trak mo ka wetem ol pasenja oli mas fasem strap blong jea.
- Bifo yu statem trak o ka, mekem sua se strap blong jea hem i stret mo yu fasem gud.
- Ol yangfala pikinini oli mas sidaon long wan stret jea blong ka, mo rul ia i talemaot wanem kaen jea blong yusum folem ej, haet mo weit blong olgeta.
- Draeva i save kasem wan faen sapos i gat eniwan long ka we i no fasem strap blong jea.



OL MOBAEL FON

- Taem yu stap draev hem i tabu blong pikimap o yusum wan mobael fon we yu mas holem.
- Mo yu stap brekem loa sapos yu putum wan mobael fon antap long tufala leg blong yu taem yu draev.
- Fulap aksiden i tekem ples taem draeva blong ka i bisi long mobael fon blong hem.



OL DRAG MO ALKOL


- Hem i denja long yu mo ol narafala pipol sapos yu draev afta yu tekem drag o dring alkol.
- Yu stap brekem loa sapos yu draev mo yu bin dring alkol we level blong alkol i kasem 0.05% i go antap. Hem i minim olsem 2 dring blong alkol.
- Bae yu save faen bigwan mo lusum laesens blong draev blong yu.



TAED

- Hem i denja blong draev taem yu filim taed.
- Sapos yu stap yon o yu sarem ae blong yu taem yu draev, yu mas stop mo rest smol.
- Mekem sua se yu rest gud biffo yu draev.
- No draev longtaem bitim 3 haoa sapos yu no tekem wan spel.

Rimemba se hem i defren taem yu draev long Ostrelia bitim long kantri blong yu. Folem ol rod rul blong Ostrelia blong mekem sua se yu wetem ol pasenja mo ol narafala pipol i stap sef.



I GAT WAN TRENING BLONG OL WOKA

Sapos yu wan woka long Pasifik Ostrelia Leba Mobiliti (PALM) skim, yu save mekem wan trening blong lanem draev.

Trening ia hem i kam anda long Skills Development Program blong PALM skim. Blong kasem mo infomesen long trening ia, toktok long emploia blong yu.

NARAFALA INFOMESEN

I gat mo infomesen long websaet blong PALM skim we i save helpem yu blong draev long Ostrelia.

Emploia blong yu i save help blong ansarem eni kwestin blong yu. O sapos emploia blong yu i no save helpem yu, yu save:

- kolem PALM skim sapot sevis laen long (1800 51 51 31)
- imelem (palm@dewr.gov.au) bitwin long 8:30am mo 6:30pm AEST.

Sapos i gat wan bigfala problem, plis kolem sapot sevis laen ia long eni taem blong dei o naet.